

## CONVENIO MARCO DE COLABORACIÓN EN MATERIA DE FORMACIÓN ENTRE A ACADEMIA GALEGA DE SEGURIDADE PÚBLICA E A CONSELLERÍA DO MEDIO RURAL, A TRAVÉS DA DIRECCIÓN XERAL DE DEFENSA DO MONTE

Santiago de Compostela, asinado dixitalmente

### REUNIDOS

DUNHA PARTE, D. Santiago Villanueva Álvarez, director xeral da Academia Galega de Seguridade Pública (AGASP), actuando no seu nome e representación en virtude das competencias que ten atribuídas polo artigo 12 da Lei 1/2007, do 15 de xaneiro, da Academia Galega de Seguridade Pública.

DOUTRA, D. Tomás Fernández-Couto Juanas, director xeral de Defensa do Monte da Consellería do Medio Rural, actuando en virtude das súas facultades, por Orde 17/11/2015, DOG nº 223 do 23 de novembro.

Recoñecéndose ambas as dúas partes con capacidade e representación legal suficiente para o outorgamento do presente convenio de colaboración,

### EXPOÑEN:

I: Conforme á Lei 1/2007, do 15 de xaneiro, da Academia Galega de Seguridade Pública, este centro é un organismo autónomo de carácter administrativo, adscrito á Consellería competente en materia de interior e xustiza. Entre outros fins, a AGASP ten encomendada a función de organizar e impartir os cursos de formación continua, perfeccionamento e especialización dos membros dos corpos de policía local, servizos municipais de protección civil e xestión de emerxencias, e servizos de prevención e extinción de incendios e salvamento, e dos/as axentes forestais, segundo o artigo 4 da devandita Lei, que tamén prevé no seu artigo 5.2 a función de promover relacións de intercambio e colaboración, coas universidades e institucións de Galicia.

II: Que mediante o Decreto 24/2010, do 25 de febreiro, polo que se aproba a estrutura orgánica da Academia Galega de Seguridade Pública (Agasp). Mediante o Decreto 88/2018, do 26 de setembro, estableceuse a estrutura orgánica da Xunta de Galicia. Así mesmo, polo Decreto 106/2018, do 4 de outubro, modificouse parcialmente o Decreto 177/2016, do 15 de decembro, polo que se fixa a



estrutura orgánica das consellerías da Xunta de Galicia.

Co Decreto 149/2018, do 5 de decembro, polo que se establece a estrutura orgánica da Consellería do Medio Rural e se modifica parcialmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, preténdese o reforzo do ámbito rural, para os efectos de aproveitar a potencialidade deste sector estratéxico de Galicia, atendendo principalmente ás propias necesidades do sector e, en especial, na prevención e extinción de incendios, respecto da cal a experiencia acumulada nos últimos anos, fai necesaria a creación dun centro directivo propio (a Dirección Xeral de Defensa do Monte) e independente da xestión forestal que acometa a defensa integral do monte en Galicia.

A Consellería do Medio Rural é o órgano da Administración galega ao cal, baixo a superior dirección da persoa titular do departamento, lle corresponde propor e executar as directrices xerais do Goberno no ámbito rural, que engloba as competencias en materia de agricultura, gandería, desenvolvemento rural e ordenación comarcal, estruturas rurais, industrias alimentarias, montes, prevención e defensa dos incendios forestais, de acordo co establecido no Estatuto de Autonomía para Galicia e segundo os termos sinalados pola Constitución Española.

III Que en aras dos principios de eficacia e eficiencia que deben presidir toda actuación administrativa, ambas partes detectan a necesidade de cooperar no exercicio da función de formación continua e perfeccionamento do persoal de prevención e extinción de incendios forestais, porque brinda a oportunidade de multiplicar os logros de cada institución reducindo os custos.

Que advertidos e convencidos do interese público e común desa colaboración, acordan formalizalo xuridicamente no presente convenio e co contido que se deriva das seguintes

## CLÁUSULAS:

### **PRIMEIRA: Obxecto do convenio.**

O obxecto do presente convenio é acordar un marco de colaboración entre a AGASP e a CONSELLERÍA DO MEDIO RURAL, para a formación continua do persoal de prevención e extinción de incendios forestais.

Esta formación levarase a cabo mediante cursos e demais accións formativas sobre temas que sexan de interese profesional e que supoñan unha mellora da súa cualificación e eficacia no servizo, a través do mantemento ou potenciación da súa capacitación, así como mediante a participación en



actividades de difusión das funcións, medios e procedementos.

O contido da formación será obxecto dunha planificación a proposta da Dirección xeral de Defensa do Monte, consensuada e temporalizada para cada anualidade ou campaña por parte da Comisión de Seguimento prevista na cláusula oitava, en funcións das necesidades que se vaian observando, ou das que puideran xurdir de xeito continxente.

As actividades formativas poderán incluír a actualización de coñecementos, capacidades e destrezas nas seguintes materias:

- procedementos e seguridade en incendios forestais
- primeiros auxilios
- conducción de vehículos todo terreo
- conducción e manexo de vehículos motobomba
- comunicacións
- ferramentas informáticas de xestión e codificación de incendios forestais
- prevención de riscos laborais en materia de extinción de incendios forestais
- calquera outra temática a maiores que puidera demandarse.

### **SEGUNDA: Cooperación e asistencia**

En base aos principios de colaboración, cooperación e asistencia no ámbito do sector público, a AGASP facilitaralle a Dirección Xeral de Defensa do Monte da Consellería do Medio Rural os medios de coñecemento e información precisos para unha mellor execución dos servizos específicos de prevención e extinción de incendios forestais que sexan competencia deste organismo. En correspondencia a Dirección Xeral de Defensa do Monte da Consellería do Medio Rural facilitaralle a información que poda ser de utilidade para a investigación, estudo e divulgación de contidos técnicos nos ámbitos da prevención e extinción de incendios forestais.

### **TERCEIRA: Organización das actividades formativas. Obrigas das partes.**

A organización dos cursos, xornadas e accións formativas en xeral, deberá axustarse ás pautas seguintes:

1. O deseño, estrutura, obxectivos das actividades formativas faranse a proposta da Dirección xeral de Defensa do Monte.
2. As datas de cada curso serán consensuados por ambas as dúas partes, podendo ser propostos



- por calquera delas indistintamente.
3. A AGASP comprométese a elaborar os programas, documentación e material para o alumnado.
  4. As solicitudes de participación que remita o alumnado dirixiranse á Dirección Xeral de Defensa do Monte da Consellería do Medio Rural, que será o último responsable da selección de admitidos ás actividades formativas.
  5. Os criterios de selección serán os que estableza a Dirección Xeral de Defensa do Monte da Consellería do Medio Rural para cada convocatoria.
  6. Feita a selección, confeccionarase unha listaxe de admitidos/as á que se lle dará a publicidade habitual para que cada solicitante saiba que está admitido/a e poida comunicar a imposibilidade de asistencia ao curso, se así fose.
  7. Comunicarase a lista de admitidos/as a AGASP, coa antelación suficiente para poder proceder á realización dos trámites de xestión oportunos.

#### **CUARTA: Profesorado, aulas e locais.**

De forma conxunta decidirase a selección e contratación dos profesores.

As clases poderán impartirse tanto na propia AGASP, como nas aulas ou instalacións da Dirección Xeral de Defensa do Monte da Consellería do Medio Rural, que presenten idoneidade, capacidade e medios técnicos bastantes, ou mesmo noutras instalacións que decidan ambas partes.

#### **QUINTA: Seguimento, coordinación e control do desenvolvemento dos cursos.**

A Dirección Xeral de Defensa do Monte da Consellería do Medio Rural, a través do seu persoal, ou polo que se determine en cada caso pola Comisión de Seguimento, asume o control dos cursos, xornadas ou calquera acción formativa derivada deste marco de colaboración, especialmente en canto á asistencia dos alumnos ás clases, o funcionamento e emprego de medios técnicos e a atención aos docentes.

Nos diplomas que se expidan ao remate de cada curso figurarán ambas institucións, e estarán asinados polo Director Xeral de Defensa do Monte e polo director xeral da AGASP. O deseño dos mesmos será determinado conxuntamente.

As certificacións que poidan requirir os docentes ou alumnos sobre a súa participación ou asistencia nas actividades formativas, poderán ser expedidas por calquera das partes, facendo constar a organización conxunta.

Debido ás características especiais do traballo do persoal ao que se dirixe esta formación, así como á



posibilidade da ocorrencia de incendios forestais, de imposible previsión temporal, o desenvolvemento dos cursos quedará en todo caso supeditado ás condicións meteorolóxicas existentes e ao risco de incendio forestal.

#### **SEXTA: Financiamento e xestión económica dos cursos ou xornadas.**

O financiamento das actividades formativas desenvolvidas ao abeiro do convenio axustarase ás seguintes regras:

1.- A Dirección Xeral de Defensa do Monte da Consellería do Medio Rural sufragará o pago de docentes, horas lectivas, axudas de custo, coordinación e outros gastos de cada curso ou acción formativa, sin que iso supoña gastos imputables a este convenio.

2.- Este convenio non supón custe económico para a AGASP.

#### **SÉTIMA: Requisitos para a obtención do diploma e réxime disciplinario.**

Ambos aspectos se regularán pola normativa aplicable na AGASP para cada tipo de acción formativa, que se especificarán en cada convocatoria.

#### **OITAVA: Comisión de seguimento.**

Este convenio será administrado por unha comisión de seguimento composta por dúas persoas designadas por cada parte, que adoptará os acordos por unanimidade.

Esta comisión, de acordo co establecido no artigo 49.1.f) da Lei 40/2015, de 1 de outubro, de Réxime Xurídico do Sector Público, é o instrumento para o seguimento, vixilancia e control do convenio e dos compromisos adquiridos polos asinantes e, exercerá as súas funcións de acordo co establecido nos artigos 51.c) e 52.3 da referida Lei.

A AGASP e a Dirección Xeral de Defensa do Monte da Consellería do Medio Rural comprométese a resolver por mutuo acordo, no seno desta comisión, cantas diferenzas resulten da interpretación e cumprimento deste convenio, sen prexuízo da competencia do Orde Xurisdición Contencioso – Administrativo para o coñecemento de todas as cuestións e litixios que puideran xurdir.

As xuntanzas da Comisión de Seguimento poderán celebrarse por medios electrónicos.

#### **NOVENA: Vixencia do convenio.**

O presente convenio ten vixencia dende a data da súa sinatura ata un máximo de catro anos de duración prorrogándose de xeito automático por anualidades naturais, salvo denuncia de calquera das partes antes da súa finalización, ou da finalización de cada unha das prórrogas. Unha vez



rematados os catro anos de duración inicial poderá ser prorrogado, previo acordo escrito das partes, ata completar un período adicional de catro anos.

#### **DÉCIMA: Causas de resolución**

De conformidade co establecido no artigo 51.2 da Lei 40/2015, mencionada con anterioridade, son causas de resolución do Convenio:

- A renuncia de calquera das partes, formulada por escrito con tres meses de antelación a data na que desexe a finalización do mesmo.
- O incumprimento das cláusulas do mesmo.
- O mutuo acordo das partes.

#### **UNDÉCIMA: Modificacións.**

As modificacións formalizaranse mediante *Addenda*, cos mesmos requisitos e condicións que para a aprobación do convenio se esixen.

#### **DUODÉCIMA: Publicidade**

En cumprimento do disposto na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, a Vicepresidencia e Consellería de Presidencia, Administracións Públicas e Xustiza, remitirá os datos necesarios para a publicidade do convenio e informará na páxina web oficial da dita subscripción cos seguintes datos básicos: identificación das partes que interveñen, importe do financiamento, data da sinatura, finalidade e período de vixencia. A sinatura do convenio implica a autorización expresa para o tratamento necesario dos datos e a referida publicidade. As partes asinantes do convenio manifestan o seu consentimento para que os datos persoais que constan neste convenio, así coma o resto das especificacións que contén, poidan ser publicados no Portal de Transparencia e Goberno Aberto.

#### **DÉCIMO TERCEIRA: Natureza e Réxime Xurídico.**

Este convenio ten natureza administrativa e rexerase polo establecido na Lei 40/2015, do 1 de outubro, do Réxime Xurídico do Sector Público, quedando excluído da Lei 9/2017, do 8 de novembro, de Contratos do Sector Público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de



2014, de conformidade co establecido no artigo 4 desa norma.

As discrepancias que xurdan pola aplicación do presente convenio serán resoltas pola Comisión de Seguimento prevista na cláusula octava. De persistir as mesmas resolverá o Vicepresidente e Conselleiro de Presidencia, Administracións Públicas e Xustiza, no ámbito das respectivas competencias, poñendo fin á vía administrativa.

#### **DÉCIMO CUARTA: Protección de datos de carácter persoal**

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación deses datos e polo que se derroga a Directiva 95/46/CE (Regulamento xeral de protección de datos), da Lei orgánica 3/2018, do 5 de decembro, de protección de datos persoais e garantía dos dereitos dixitais, do Real Decreto 1720/2007, do 21 de decembro, polo que se aproba o Regulamento de desenvolvemento da LOPD, e demais normativa vixente de aplicación en cada momento en materia de protección de datos.

O presente convenio obriga ao cumprimento do expresamente pactado, someténdose ambas as dúas partes ao acordado en todas as estipulacións, e como proba de conformidade asínase, no lugar arriba indicado.

**POLA ACADEMIA GALEGA  
DE SEGURIDADE PÚBLICA**

**Santiago Villanueva Álvarez  
Director Xeral AGASP**

**POLA CONSELLERÍA  
DO MEDIO RURAL**

**O CONSELLEIRO**  
P D Orde do 17/11/15  
(DOG núm. 223 do 23/11/15)  
**Tomás Fernández-Couto Juanas**  
**Director Xeral de Defensa do Monte**

